

Scola grischuna introducescha il model 1+1

Religiun sin il stgalim superiur da la scola populara

■ (anr/fa) A partir da l'onn da scola 2012/13 dattan las baselgias chantunalas mo pli ina lecziun da religiun l'emna. Da nov vegn introducida sin il stgalim aut ina lecziun «enconuschientscha da las religiuns ed etica». Fin ussa devan las baselgias chantunalas a las scholaras ed als scolaras da la scola populara che fan part d'ellas duas lecziuns da religiun l'emna. «Da primavera 2009 però è vegnida suttamessa al suveran l'uschenunada iniziativa d'etica intoltrada dals giuven socialists», ha declerà cusseglier guvernativ *Martin Jäger* memma a Cuira a chaschun d'ina conferenza da pressa. El era accompagnà da *Dany Bazzell* che maina l'uffizi per scola populara e sport. Las baselgias chantunalas eran rapreschantadas da *Vitus Dermont*, il manader dal post er l'instrucziun da religiun da la Baselia catolica, e *Roland Just*, reverenda e cusseglier da la Baselia evangelica grischuna.

«Finalmain pronts per introducir quest model»

«La populaziun grischuna ha acceptà dal 2009 la cuntraproposta dal cusseglier grond ch'è er vegnida sustegnida da las baselgias chantunalas», ha cuntinuà *Jäger*. La decisiun prevesa che las baselgias chantunalas dettian a las scholaras ed als scolaras ch'èn commembers d'ina da las duas baselgias chantunalas ed a talas e tals che vulan far part da quell'instrucziun mo pli ina lecziun da religiun. Persuenter vegn introducida ina lecziun «enconuschientscha da las religiuns ed etica» che sto vegnir frequentada obligatoricamain da tut las scholaras e da tut ils scolaras da la scola populara. Uschia è l'instrucziun da religiun concepida da nov tenor il model 1+1. «Sunter la fasa d'elavuraziun dal plan d'instrucziun e suenter



La Baselia catolica era rapreschantada da *Vitus Dermont* (san.) e la Baselia evangelica da *Roland Just*.

FOTO F. ANDRY

la qualificaziun posteriura da las persunas d'instrucziun pon ins uss finalmain introducir a partir da glindesdi quest nov model.» Sco che *Bazzell* ha ditg vegn fatga la midada successivamain, «uschia ch'igl è pertutgada mintgamai ina classa supplementara per onn, cumenzond cun l'emprima classa dal stgalim superiur.» La fin da l'onn da scola 2014/15 vegn la midada sin il stgalim secundar I ad esser terminada. «Cura ch'il plan d'instrucziun 21 è avant maun, duai il model 1+1

vegnir introducì l'onn da scola 2017/18 er sin il stgalim primar, resguardond las experientschas ch'èn vegnidas fatgas sin il stgalim superiur», ha l'infurmà.

Enconuschientscha da las religiuns ed etica

Cun «enconuschientscha da las religiuns ed etica» vegn introducì in nov rom, per il qual è responsabel il chantun. En vista a l'introducziun da quest nov rom vegn realisada ina qualificaziun posteriura per

las persunas d'instrucziun en furma d'in perfecziunament che dura duas emnas. La qualificaziun posteriura vegn purschida dapi l'onn 2011 e fin l'onn 2014. «Tenor il stadi actual da la qualificaziun posteriura pon ins far quint che las instituziuns ch'èn responsablas per la scola hajan avunda persunas d'instrucziun per il nov rom», ha ditg *Dany Bazzell*. Ils custs per la scolaziun s'amuntan sco ch'el ha menziunà a 250 000 francs. Tenor il plan d'instrucziun ha il rom la finamira da

promover la cumpetenzza da sa fatschenttar cun dumondas da l'etica, cun differents tradiziuns religiosas e cun diversas valurs en il senn d'ina convivenza paschaivla plain responsabladad. La dimensiun da l'enconuschientscha da las religiuns duai intermediar tenor *Martin Jäger* enconuschientschas davart la religiun or d'ina perspectiva externa (cuntrari a l'instrucziun da religiun che vegn chapida sco furmaziun religiosa or d'ina perspectiva interna) e promover la cumpetenzza interculturala da sa fatschenttar cun differents religiuns ed ideologias. «La dimensiun etica dal rom vul percenter cunzunt promover la cumpetenzza da giuditgar e d'agir a moda etica.»

Dapliuras purschidas da vart da la baselia

Roland Just e *Vitus Dermont* han ditg che da la grupp da lavur ecumena fachevan part represchents da l'Ethikzentrum Zürich, da las duas baselgias e dal chantun Grischun. «Il plan d'instrucziun sa basa sin il plan d'instrucziun per il rom da religiun vertent», ha ditg *Dermont* e *Just* ha concretisà: «Ils temas principals èn cardientscha, Jesus Cristus, etica dal Vegl e dal Nov Testament ed istorgia da la Baselia.» Cun il model 1+1 spargnan las baselgias chantunalas la mesadad da las finanzas ch'ellas han da pajar per l'instrucziun da religiun sin il stgalim superiur da la scola populara. Sco che *Just* e *Dermont* han ditg prevesan las baselgias d'investir quels meds finansials en novas purschidas: «Quellas duain esser a favur da la furmaziun dad uffants fin seniors», ha ditg *Just*. *Dermont* ha declerà ch'ins haja ultra da quai era l'intenziun dad intensivar la lavur da la Baselia cun ils giuvenils.